

## 天生自然-詩作自選 5 首

### 1.<心悶，大肚山>

欲暗仔 ê 目神，熱人  
發出一葉心悶 ê 穎  
思念，就按呢，恬靜飛過大肚山

有大肚溪 ê 腹腸，有大甲溪 ê 堅心  
也有筏仔溪 ê 溫存，哪會做伙透濫  
一種秋清 ê 聲嗽……

一陣風吹來，有淡薄仔海 ê 鹹味  
聽無妖嬌 ê 玫瑰花，美麗 ê 歌聲  
彼个骨力用鋤頭寫詩 ê 老詩人  
嘛毋知閣有佇厝無？  
花園，若親像拋荒足久足久矣  
毋過，故事猶原佇雜草裡綿爛生炭……

聽講，相思仔樹開始閣咧相思矣  
禿頭禿頭 ê 大肚山，佇這陣黃酸仔雨裡  
學彼支鋤頭澈底覺悟，一雙活靈靈 ê 目睷  
總是愛臭彈，往過樹林 ê 草色花芳  
彩光滿滿……啊，南風恰鳥仔  
攏來替土地公種樹護土 顧山林  
我嘛紮一首青春少年時 ê 詩，來唸歌  
做伙走揣，一个興旺奢颺 ê 形影

暝，幔一領烏衫，慢慢仔  
行落來山崙，山跤繁華 ê 街市，燈光閃爍  
一尾一尾 ê 火蛇，佇酸甜苦澀內面 四界趨……

一隻神神 ê 火金姑，雄雄一越頭  
煞看著舊年，予無名火燒甲賭一枝硬骨  
彼穰有氣魄 ê 相思仔樹，伊  
當麗咧月娘溫暖 ê 胸坎仔，獨相思

思念，就按呢，輕輕仔  
飛入去阮心肝

註解：

大肚山：Tuā-tōo-suann，位於大肚溪與大甲溪之間，地理學上稱之為大肚台地，最高出海拔 310 公尺。幾近全面開發，原生森林消失殆盡。昔日平埔族原住民在此建立大肚王國，因而得名；文學家楊逵亦曾在此經營東海花園，名譟一時。

熱人：juáh--lâng，夏天。

發穎：puh-ínn，發芽。

透濫：thàu-lām，摻雜。

秋清：tshiu-tshing，涼爽。

綿爛：mî-nuā，堅持。

黃酸仔雨：ng-sng-á-hōo，梅雨。

紮：tsah，攜帶。

奢颺：tshia-iānn，大派頭。

幔：mua，披。

趁：sô，爬行。

神神：sîn-sîn，發愣。

麗：thenn，躺。

——2018/6/27

## 2.<大甲溪 ê 美麗佻哀愁>

是講，一條溪河  
一世人攏總有佻濟哀愁？  
啊！溫柔 ê 目屎  
對南湖大山勻勻仔流落來  
一百二十四公里長 ê 心意，灌沃  
千千萬萬 ê 性命佻靈魂

一尾瘦卑巴 ê 魚仔  
用伊薄薄e翼，順勢綴水流  
學佛祖千年前了悟 ê 目神  
共腹腸掌開，包山包海，包天包地  
甚至連人上糞埤彼粒心  
嘛予伊慈悲 ê 疼惜

是講，一條溪河  
一世人攏總有佻濟目屎？  
南湖溪、合歡溪、七家灣溪  
溪水透濫做 ATayal 豐沛美麗 ê 記持  
佇胸坎仔內滾絞、滾絞……

無錯！我就是彼尾魚  
腰身一蕊一蕊櫻花 ê 印記  
愈來愈殍，愈來愈霧  
霧甲記袂牢祖先 ê 面腔，佻色水  
歪膏脚斜 ê 喙，嘛已經無彩虹 ê 形矣  
無才調閣畫出千千萬萬年前  
彼蕊自在行過冰河 ê 笑容……

是講，彼條溪河  
對頭到尾，數十座奢颺 ê 水壩  
予阮流落大海 ê 目屎  
欲翻頭煞揣無轉厝 ê 路，哀傷  
仙跳都跳袂過……

註解：

大甲溪：Tāi-kah-khe，主流 124.2 公里長，流域大都在台中市，主支流南湖溪發源南湖大山，另兩條重要支流，合歡溪與七家灣溪。冰河時期遺留的國寶魚——櫻花鉤吻鮭，生活在七家灣溪，失去回游能力，成了「陸封型」魚類。

ATayal：泰雅族，台灣第三大、分布最廣的原住民族，有紋面和出草的習慣。

沃：ak，澆灌。

翼：sit，翅膀。

綴：tuè，跟隨。

撐：thènn，撐開。

糞埤：pùn-sò，垃圾。

豐沛：phong-phài，豐富。

涸：phú，灰濛。

歪膏擱斜：uai-koo-tshih-tshuah，歪七扭八。

奢颺：tshia-iānn，愛出風頭。

——2019/7/20

### 3.<台灣杜鵑>

一時，全世界  
攏恬靜落來  
風，若輕輕仔  
咧吹

山，前世今生  
敢猶有你 ê 記持  
面容？

我共我 ê 躊躇  
懷疑，鋪做一領  
厚厚 ê 地毯  
軟獸仔軟獸  
予天頂 ê 雲，佱霧  
安心，麗落來

有人咧問  
插佇阮頭鬚  
遐，白色 ê 花  
是按怎紅芽仔紅芽  
閣小可仔澹澹

無人知  
彼，攏是  
春天 ê 眠夢

我虔心  
共所有 ê 夢想  
箍做伙  
啞愛情來犯罪

上好是  
共判無期徒刑  
關佇阮心肝底  
關到老，關到死  
關到三生七世

永遠無法度超生  
輪迴

有人咧投  
愛著較慘死

無人知  
花開，花謝  
內面嘛有月娘  
講袂出喙 ê 寂寞  
孤單

若牽磕著  
性命 ê 意義  
一時，山 ê 目屎  
就輾落來矣

變做雲，變做霧  
變做風  
偷偷仔共你  
吹去遙遠 ê 夢中

註解：

台灣杜鵑（*Rhododendron formosanum*）：Tâi-uân-tōo-kuan，台灣特有種，分佈中低海拔山區，生長在嶺脊陡坡，常於霧林帶形成純林，林下積累陳年腐植土，鬆軟有彈性，踩踏其上，如天然地毯般溫柔。花，雪白帶淡桃紅，葉片往上微翹，成禱告之姿。

躊躇：tiû-tû，猶豫。

懷疑：giâu-gî，懷疑。

軟馱：nng-sim，柔軟。

麗：thenn，半躺。

澹：tâm，濕潤。

箍：khoo，圈/圍攏。

啞：siann，吸引。

投：tâu，投訴抱怨。

牽磕：khan-kháp，牽扯碰觸。

輾：liàn，滾動。

——2020/10/18

#### 4.<台灣百合>

經過幾若百萬冬  
凝心，恰注目  
你才甘願  
成做一蕊花

好親像  
太平洋 ê 海湧  
等規世人  
才欲佇阮耳空  
靠岸

我聽著，天外 ê 天  
彼款永遠  
無邊無界 ê 聲

足久矣  
是按怎  
我一直毋敢放心  
叫你 ê 名

無論好天落雨  
日時，抑暗暝  
遙遠 ê 夢中  
總是，有一粒澹澹  
溼溼 ê 目矚  
掠我金金看

無的確  
彼是神，抑是  
頂世人  
失眠 ê 天星

是按怎  
你輕輕仔一下反身  
玉山  
就開始透風落雨

彼隻漂浪 ê 海翁  
無疑悟  
佇阮心肝窟仔  
停跤，歇暍

幾若百萬冬 ê 憂悶  
雄雄做一下釘根  
化做一座  
自在 ê 蕃薯仔島.....

你猶原  
一蕊迷人 ê 花  
頭犁犁

按呢  
風雨若停 ê 時  
我敢會使，用咱母語  
閣叫你 ê 名？

註解：

台灣百合 ( *Lilium formosanum* )：Tâi-uân-pik-háp，台灣特有種，海邊至 3000 公尺高山都有其蹤跡，生命力強韌，常被用來做為台灣精神象徵。戒嚴時期，台灣兩字，每每成為禁忌。花雪白，有紫色邊紋。

凝心：gîng-sim，鬱悶。

澹：tâm，溼潤。

無的確：bô-tik-khak，或許。

反身：píng-sin，翻身。

無疑悟：bô-gî-gōo，想不到。

——2020/8/23

## 5.<人面蜘蛛>

我偷偷仔學你  
用所有 ê 情意  
來織一領美麗 ê 網  
五百冬矣  
所網著 ê，竟然  
干焦賭孤單，恰憂煩

規世人  
儉心肝底 ê 自在  
是按怎，袂堪得  
一場小小 ê 風颱.....

我知影，現此時  
你恰風做伙咧笑我  
倒頭栽 ê 目神  
就是證明

抑是，是非錯亂 ê 世間  
人生，原底就是倒頭栽？

啊，我彼領破糊糊 ê 網  
猶原咧等，等暗時 ê 月光  
等透早 ê 日頭，等  
一滴清心 ê 露水  
滴落來  
我焦澀、驚惶 ê 目睷.....

擔頭，愣愣仔看  
聽講，你遐  
是離神上近 ê 所在

註解：

人面蜘蛛 (*Nephila pilipes*)：Lâng-bīn-ti-tu，又稱大木林蜘蛛，台灣最大型的蜘蛛。頭胸背板有人面斑紋，故得名。

賸 (tshun)：「剩下」。

儉 (khiām)：「儲存」。

焦 (ta)：「乾」。

愣愣 (gāng-gāng)：「出神發呆」。

——2018/5/11